



阿母恰香芳

細漢的時，阿母咧做裁縫，因為手路誠幼，親情朋友攏會提布來予伊做衫。若是有色水較嬌的布幼仔，勤儉的阿母就會共拏起來，伊講這會當做誠濟無全款的香芳。

五日節欲到的時，阿母就會款寡棉仔恰紅紗線，閣去漢藥店買一寡芳料，看布幼仔的色水來做香芳。若有黃色的綢仔布，伊就用來紩一隻虎仔型的袋仔，共搵芳料的棉仔攞入去內底，閣擰烏筆仔額頭寫一字「王」字，佇身軀畫一逝一逝的虎紋。這個時陣，就出現一隻威風凜凜的虎仔香芳囉！若是有茄仔色的布，伊就會做一條金滑金滑的茄仔，閣會佇茄仔頂懸鬥一葉青色的蒂頭，看起來誠古錐。啊若有花仔布，伊就會用來鉸一塊紅色的雞髻，紩佇雞頭頂懸，佇雞尾插幾枝仔雞毛，做一隻鵲的雞鵲仔香芳。總講一句，若有啥物料，阿母就做啥物款的香芳。

阮庄裡有一个風俗，就是查某囝嫁出去的頭一冬，為著欲表示新娘腹腸闊，後頭厝攏會佇五日節進前，送六掙香芳去予伊。一掙差不多有二十个，通分予厝邊頭尾的囝仔。聽講掛這種香芳的囝仔，會加足好育飼。逐家踹全庄，啥人 兜有嫁娶攏嘛知，逐擺攏有真濟人來共新娘討香芳。庄裡的人知影阿母真勢做香芳，攏會來倩阿母做。

這個時陣，阿母做的香芳，花樣就真濟款囉！人客欲掙啥就做啥。阿母講每一款香芳，攏有伊的含意。譬論講掛雞會起家；掛塗豆會食甲老老老；金瓜厚子，掛咧會生較濟囝仔；掛虎較猛虎；掛茄會鵲；掛粽金銀財寶對恁兜送。也因為阿母攏會應人客的要求，逐擺生理誠交易，做攏袂離。

阿母有歲矣，目睷嘛愈來愈花，無法度閣紩幼路的香芳，伊就掛一副目鏡，做一隻大大隻的雞鵲仔香芳予孫掛。遠遠看去袂輸掛一塊大金牌，愈看愈心適。看起來，佇阿母的記持內底，五日節是一定愛掛香芳才有準算喔！

作者：陳秋貴

☆詞彙學習☆

- | | |
|--------------------------------------|------------------------------|
| 【香芳】hiunn-phang：香包。 | 【鵲】tshio-tiô：輕浮不莊重的樣子。 |
| 【手路】tshiú-lōo：特殊的手藝、手法。 | 【雞鵲仔】ke-kak-á/kue-kak-á：小公雞。 |
| 【五日節】Gōo-jit-tseh/Gōo-lit-tsueh：端午節。 | 【好育飼】hó-io-tshī：指孩子健康，很好養育。 |
| 【金滑】kim-kút：光亮滑潤。 | 【掙】tih：要、欲。 |
| 【雞髻】ke-kuè/kue-kè：雞冠。公雞頭上高起的紅色肉冠。 | 【交易】ka-iàh：指生意興隆的樣子。 |